


Papu sh-pita di-curcubetâ.

Tu-unâ dzuâ di vearâ, ca ti prândzú, tamam candú soarili kinduri disuprâ di-uboru-ali casi ta s-lu-areascâ di-aumbri cu metura-lui di-arazi, Custandin, un ficior di vââ paisprâdzats di-anj, ishâ dit casâ s-lu caftâ papu-su; lu vidzu papu-su Nisa cum shidea ndupurat di-un ouarbâr, pi-unâ vilendzâ.

Niheamâ ma-nclo di papu-su, shidea muma-sa tsi scârmina lânâ, tu poalâ.



Papu s-ncljina tu un somu dultsi; când sh-când, zdicljidea oclji sh-mutrea deavigâra, cânda s-nu lu-veadâ vââ cum s-nclijnâ tu-somú.

Al Custandin, lj-arâsea s-batâ kitâra, sh-cafi oarâ, când nvitsa vâru cântic nou, vrea s-lj-u spunâ prota-a papu-sui. Imnâ ca-aghunjiusit câtâ papu-su sh-lj-aurâ cu-unâ boatsi-mplinâ di harau:

-Papo, papo, papo...

Papu s-dishtiptâ ca lâhtrâsitu, sh-analtsâ cârlibanea tish cânda vrea s-da pi vâru,

-Tsi, tsi esti?Tsi esti?, aurâ papu; intră vâru lupú tu cutarú? Oclji lj-avea ca kiruts tish cânda lj-avea pitricutâ la cutari sh-lj-ashtipta ta si s-toarâ.

-Uh, s-ts-u da kicuta, gri muma câtâ papu, tsi fats-ashă ca vâru zurú?

-Tats more tini sh-scarminâ! lj-u tâlje papu cu-inati, câ muma lu-vidzu ca kirutú tu lâhtrâseari.

- Eh, nipoate, tsi-easti? Tsi eshti ashă ca-aspâratú? gri papu-a nipot-sui sh-nâpoi si-andupurâ di pom sh-cljisi oclji.

-Papo, gri ficioru, ia, feciú-unú cântic nou!, sh-cum zbură ficioru u-bâgă kitara-ntru mânj ta s-cântâ.

Papu zdicljisi oclji, lu-mutri nipot-su, si-ndriptâ niheamâ ditú pultâri, sh-dzăsi;

-Ehee, nipoate, multú hârios s-avd-unú cânticú nou, câ nji si-murzuirâ atseali vecljili, tutú-atseali sh-mata atseali. Aidi, lja-lj-u tini sh-mini va s-lj-u ducú.

-Eh, moi papo. dzăsi ficioru,, aistú cânticú nu-easti di atseali vecljili tsi li-shtii tini, easti altâ soi di cântari.

-Em ghini, dzăsi papu, acats-u tini, sh-mini va s-lj-u ducú pin-dau.

-Uh, s-ts-u da kicuta, arsâru muma, dzăsi ficioru câ nu easti di-atseali vecjlji.

-Em, tats tini more sh-scarminâ!, lj-u tâlje nâpoi papu cu inati, câ nu para-avdza ghini, sh-câti vloarâ nu lji si-uidisea zboarrâli

-Sh-cum si-acljamâ cânticu nipoate, antribâ papu sh-lu mutri nipot-su cu sumarăsú.

-Trastu-ALI BANI, gri nipot-su sh-trapsi deadzitili pisti hirili di la kitârâ ta s-ahurheascâ s-cântâ.

-Trastu-al Ali Baniiii!, arsâru papu. Tsi câftash tini la dukeanea al Ali Baniiii?! Turcu aistú nu pot s-lu hânupsesc ici di cându nj-u deadi cafeia dip-aratsi; ma s-ai anaghi di-vărú trastú, mea, ari papu tsintsi trasti, atsia tu-sinduki.

Caftu-a mumâ-tai si-ts da unú, dau, câti vrei.

-Uh, s-ts-u da kicuta, arsâru muma, mea scoalâ tini sh-dâ-lj-u trastu-a ficiorui; sindukea shtii iu-easti.

-Em, tats tini more! Tats-atsia sh-scarminâ!, lj-u tâlje papu nâpoi-ali mumi.

Nipotu âlj mutrea dolji sh-nu putu si s-dânâseascâ s-nu arâdâ.

-Eh, more papo, nu-easti zboru ti-Ali Baniiii, turcu a-tâu. Easti zboru ti-banâ! Trastu-ali bani! Banâ! Shtii tsi-easti bana?!!!

-Bana? Anjia-nj dzâts ti-banâ? Aide nipoate, nu shtiu mini tsi-easti bana?, acâtsă papu s-aurâ.

-Uh, s-ts-u da kicuta, dzăsi muma cu boatsea ma-ashtiratâ, cânda s-avdâ mash nâsâ. Muma nu sh-lu-anâltsâ ici capu di la scârminari; s-pari câ papu, nu u-avdzâ, câ nu s-turâ ici câtâ nâsâ.

-Bana, nipoate, aura papu, sh-mutri câtâ, muma, bana easti ca-vârâ kicutâ; atsea easti bana; unâ kicutâ!

Papu li-dzâtsea zboarrâli, tish cânda li-ndisa tu-vârú trastú
s-ncapâ ma multi; ama cum yini aistâ, dzăsi papu ca minduitú; cum,
demec, bana ari trastu?! Cum s-ncapâ bana tu-trastu!?

Ali-mumi nu lji s-i arâvdâ; kinduri di-scârminari, sh-lj-aurâ
al papu:

-S-ts-u da kicuta! Tsi soi-âlj zburâshti ashă a ficioru! Alasu ficioru
s-cântâ!

-Avdz nipoate, gri papu, avdz ma nu-avdz! Cum ts-u dzâsh, unâ
kicutâ easti bana! Ia, mumâ-ta, tutâ dzua cu kicuta-n-gurâ, di nj-u
featsi bana unâ kicutâ!

Aidi tora, cântâ-a papu, sh-cum zburra s-dupurâ nâpoi
di-pom sh-cljisi oclji.



Custandin acâtsă s-batâ kităra, sh-u-andreapsi niheamă boatsea, sh-acâtsă s-cântă:

“Căti unoară mi minduiescú....”

Ma nu-apucă s-cântă alanti zboarră, că papu zdicljisi oclji sh-dzăsi:

-Aide nipoate, mash căti vloară minduiesti tini?! Sh-cum zburra, u-mutrea cărlibanea tish cănda sh-li-avea ascumtă minduierili tu-năsă; ma s-minduiam mini mash căti vloară, nu va s-aveam ază, dzatsi njili di oi, trei njili di cāpâr sh-vără tsintsi suti di muli.

-Uh, s-ts-u da...acâtsă muma s-dzăcă, ama papu u-mutri narălu sh-lj-u curmă zboru:

-S-ts-u da atsăia!; scarmină atsia sh-tats!; cănda mini nu lu-alasu ficioru s-cântă.

Muma lu-mutri sh-ea narălu, âlj deadi mândzili, sh-dapoia sh-u-aplică capu tu-poală, tish cănda vrea s-caftă tsiva zboarră, s-lji li-amină-al papu. “Uh, s-ti fats defi, ts-ar fudzită sh-atsea tsi ts-arămasi; ti-glârish dipú” shushură muma, ama papu, nu u-avdză ici.

-Sh-dapoia tsi dzătsi cânticu-ntribă papu.

Custandin, ahurhi diznou s-cântă:

“Căti unoară mi minduiescú...”

Di-iu vinim sh-cătă-iu nidzemú..

-Aide nipoate, acâtsă năpoi papu sâ zburască; ficioru năpoi s-kinduri di cântari sh-lu-asculta papu-su cu tinjii di nipotú.

-Cum nu shtii tini, di iu yini sh-cătă iu nedz! Ia, mini yinú cathi seară di la cutarú, iu li-mulgú oili, sh-negú cathi tahina, tutú la cutar, di li-pascú oili! Demec, shtiu di-iu yinú, shtiu-iu negú!

-Eh, moi papo, dzāsi ficioru, aistâ tsi dzāc mini easti niheamâ di filuzufii...

-Hiljiu-ali Fii? Tsi pâtsâ hiliju-ali Fii? Tahina irra-aua di lo niheamâ di firinâ ta s-facâ tetâ-ta Fia pitâ. Ia, vâhi s-featsi pita câ nj-anjiurdzesc nârili, sh-cum zburra papu sh-li-anâltsâ nârili sh-acâtsâ s-li tragâ pi vimtú.

-Curcubeti hearti, arsâru muma; cum ts-u deadi dip kicuta; tsi Fii dzâtsi ficioru? Ficioru dzâtsi filuzufii! Atselj tsi minduiescú multú, nu ca tini tsi tutâ dzua misuri oili, câpârli sh-mulili.

-E, e, dzāsi papu, âlj pitârcui-ali Fii sh-unâ curcubetâ.

Anjia u s-nj-u facâ pita di-curcubetâ; eh, moi ficioru-a papu, dzāsi el. Alas-u mumâ-ta câ nu para-avdi ghini mârata; nu lj-u bagâ tu-corú; aidi, cāntâ niheamâ câ nj-arâseshti cânticu. Ia, mini u s-fac ...eeee...Nu ti-alasâ papu tini, sh-nitsi nu bitisi zborru, câ pârnji papu s-facâ ..eeee...Ficioru-ahurhi s-batâ kitāra sh-ti ciudia a lui, s-avdza ghini cum cânta papu...eeeeee...Sh-dapoia, cu mari harau acâtsâ s-cāntâ:

“Câti unoarâ mi minduiescu...eeee

Di-iu vinim sh-câtâ iu nidzemu...eeee

Locu i-veclju ma bana-i shcurtâ...eeee

Pân s-u adukim, oara-i târcutâ...eeee”

-Ghini dzâts, gri papu. Târcu oara sh-Fia nu vini ninga cu pita....eeeeee...Ficoru cânta ninti

“Dumidzā ne-ar datâ minti...eeee

Omu s-neagâ tut-mash ninti...eeee

Ma-ahântâ minti nu ne-ar datâ...eeee

Sâ shtibâ omu, ninti cum s-neagâ...eeee”

-Nu shtiu câtâ minti v-ari datâ-avau nipoate, ama anjia-nj deadi Dumidzâlu multâ minti; ia, mini shtiu s-negú ninti;

Papu s-i sculâ sh-acâtsā s-neagâ pit-uború.

-Ia, nipoate, vedz?,shtiu s-neg ninti, sh-mini shtiu-iu negú! Negú tora la Fia s-mācú pitâ di-curcubetâ, sh-cum imna, ishe dit-ubor sh-lo calea câtâ hilji-sa Fia, tsi dearihina, avea bâgatâ kirkelu s-facâ pita.

Ficioru kinduri di cântari; dolji cu mumâ-sa, lu-mutrea papu Nisa, cum nidzea ninti pit-uború sh-cum ishe nafoarâ s-neagâ ta s-mācâ pitâ di-curcubetâ.



